

廣弘明集

冊二

廣弘明集卷第六

唐終南山釋道宣集

辯惑篇第二之二

敘列代王臣滯惑解上

有唐太史傳奕者本宗李老猜忌釋門潛圖芟剪用達其部武德之
始上書具述既非經國當時遂寢奕不勝其憤乃引古來王臣訕謗
佛法者二十五人撰次品目名爲高識傳一帙十卷抄於市賣欲廣
其塵又加潤飾增其罪狀至於張魯據於漢中黃巾反於天下斯並
李門勃逆皆覆而不顯非謂篤論之文乎若夫城高必頽木秀斯拔
推我清峻故有異道嫉之不足怪其鄙吝未見廝徒皂隸有加惱辱
豈非目翳何事屏除故因其立言仍隨開喻此則古來行事釋判天
分未廣見者謂爲新致聊陳舊解略顯由途資此神開可稱高識又
傅氏寡識才用寄人集敘時事廢興太半坑殘焚蕩之事可號非政

所須沙汰括檢之條斯寔王化之本故僧條俗格代代滋彰此乃禁
非豈成除毀傳氏通入廢限是謂披毛之夫終淪塗炭可悲之甚矣
奕學周子史意在誅除搜揚列代論佛法者莫委存廢通疏二十五
人大略有二初則崇敬佛法恐有淫穢故須沙汰務得住持其二則
憎嫉昌顯危身挾怨故須除蕩以暢胸襟

初列住持王臣一十四人傳奕高識傳通列爲廢除者今簡則興隆
之人

宋世祖唐高祖王度顏延之蕭摹之周郎虞愿張普惠李瑒衛元
嵩顧歡邢子才高道讓盧思道

二列毀滅王臣一十一人傳奕高識傳列爲高識之人今尋乃是廢
滅者

魏太武周高祖蔡謨劉晝陽銜之荀濟章仇子陀劉惠琳范縝李

緒傳奕

減省除滅半之

王文同

初序沙汰僧衆者夫以稊稂之穢青田榮華之弊白首者良有以也
故六羣之過興舍衛十濫之僞起毗離大聖因立條章無學由而正
犯遂有七攢量其小失四法拔其大愆張網目而示三千顯律儀而
陳八萬故得正像咸稱有道內外同號無塵自法漸王門金科之刑
無墜僧羅海岳藏疾之隙滋彰舉統以法繩之烹鮮之儀可覲隨機
以時勸勉握泥之喻自隣人誰無過垂珠之誠有津醜迹易欣掩耳
之失難覩所以宋唐兩帝王顏等賢鑒物性之昏明曉時緣之淳薄
縱釋門之紛蕩則淄澠一亂彈僧徒之得失則涇渭殊流斥貪競之
鄙夫毀藏積之僧滓存高尚之道德延重惠以攝人至如漢魏齊梁
之爲政也恢恢天網取漏吞舟察察王政事兼苛濫所以大弘佛法
通濟於五乘該洽明時陶漸於清濁使濁者知歸令自新於大造清
者容養悟適化之多方其猶大赦天下逋逃因之改容忘瑕納衆羣
小以之遷善堯舜豈非聖主而化不及丹朱漢祖焉樂亂階而亮貫

高之逆孔門季路雖僻而預昇堂釋種達多乃邪而參清衆是知權道抑揚神幾利用或收或縱事出乘時後序除廢三寶意者夫以保形存命有生之所貴重財愛食鄙俗之共珍故位稱大寶無以摧於死生力拔青山莫有亡於老病斯佛教也故四山常逼王位非常三相恆遷生涯有數斯實錄也俗有讖記之傳不知由何而得或云口授或述符圖虛然顯密布露士俗竊以五運更襲帝者一人自餘凡叟誰之顧錄周祖已前有忌黑者云有黑人次膺天位故齊宣惶怖欲誅稠禪師稠以情問云有黑人當臨天位稠曰斯浪言也黑無過漆漆可作耶齊宣妄解手殺第七弟渙故可笑也周太祖初承俗讖我名黑泰可以當之旣入關中改爲黑皐朝章野服咸悉同之令僧衣黃以從讖緯武帝雄略初不齒之張賓定霸元嵩賦詩重道疑佛將行廢立有實禪師者釋門之望帝亦欽重私問後運是誰應得實曰非僧所知帝曰如讖所傳云黑者應得僧多衣黑竊有所疑實曰

僧但一身誰所扶翼決非僧也帝曰僧非得者黑者是誰實曰至尊大人保信浪語外相若聞豈言至聖黑者大有老烏亦黑大豆亦黑如是非一可亦得耶帝聞有姓烏姓竇者假過誅之元其情本疑意在釋遂卽蕩除魏太武本是戎鄉素無文墨八歲登位一信崔浩故兩帝厚身信讒信讖陵殘佛化自取殃及旋踵更興興由時來不在人力故經傳云佛化惟遠終於六萬歲時住持小聖功在九億無學不可削也蔡謨已下上事諸賢並挾私忿於僧有隙發憤忘身何況佛法極筆而書罪狀深文而挂刑網禿賊以驚視聽妖胡而動王臣且律令條章未若凝脂之密潛潛天網自有陷目之夫言賊斯卽盜科迷妖乃當死例書表盛云妖賊未識妖賊是誰可謂匿名之書足投諸火如須勘檢虛迹自形前後上事雖有十賢荀濟一夫差有才用自餘連寫未足人聞傳奕後來謂自脫穎言無典據才氣虛劣瓦礫云寶賢愚所輕然奕素本道門起家貧賤投僧乞貸不遂所懷蓄

憤致嫌固其本志武德之始西來入京投道士王歸歸左道之望都
 邑所知見其飢寒延居私宅歸通人也待以上賓三數日間遂通其
 婦入堂宴語曾不避人歸有兄子爲僧寺近歸宅因往見之奕大瞋
 怒僧便告歸歸初不信曰傳奕貧士我將接在宅豈爲不軌耶僧曰
 叔若有疑可一往視相將至宅果如所言歸掩氣而旋歸有女壻爲
 果毅常以爲言奕既竊妻而傳妖不可算矣如唐吏部唐臨冥報所
 傳神爲泥人固其宜哉如別所顯隋大業八年天子在遼有王文同
 者郊東王堡人也夙與僧爭水磴之利勅令巡問軍實乃矯詔集僧
 三木加身考令臣反并令引邑義同謀遂誅翦僧徒於河間郡殺道
 俗近一千人傳符達於蒲州酷聲徧於天下時竇慶爲河東太守以
 狀奏聞帝大怒於河間戮之未及加刑百姓嚮之生噉乃及於土地
 以此反例下迷及僧亦相符此然初因僧起謗毀佛法感因宿忿不
 思累劫之溺而欲一時泄之泄在帝臣非關上事非位不謀已如前

咎徒爲舉斧終陷磨胸故集者隨傳敘之庶後葉之龜鏡也

後魏世祖周高祖宋世祖唐高祖趙王度晉蔡謨宋顏延之宋蕭摹之宋周郎宋虞愿魏張普濟魏李瑒齊劉晝魏楊銜之

後魏世祖太武皇帝初立道學置道壇廢佛宗帝姓託跋氏諱伏釐後名燾鮮卑胡人之別種也西晉之亂有託跋廬據有朔方晉就封爲代王廬孫什翼犍或云珪部落逾盛衆十萬北連雲中西據陰山雲中南去漠塞四千里以東晉孝武太元初南至朔東三百里平城爲都二十餘歲依華造殿宗事佛道登位三十四年至晉帝隆安中第三主託跋燾立時年八歲尙在幼冲信任司徒崔浩浩尤不信佛情重李老仙術以道德經授帝令諷味因便重之登位二年召天下方士有道士寇謙之者道門之魁傑也自云於嵩高值天尊飛下召謙賜以天師之號令奉太平真君置靜輪天宮可獲仙道列辟聞之若遺而浩深信之帝由是於平城郊置道場方二百步重層崇峻并

備厚禮具如釋老志所述後改號太平真君以遂寇謙之道命也因
蓋吳作亂關中有沙門畜弓矢浩便進說與吳通謀遂誅長安沙門
焚破佛像四方亦然唯留臺下至真君七年遂一切蕩除坑僧破像
自以爲得志也爲讒所黷幽殺太子惡疾殃身方族誅崔浩何嗟及
矣不久爲闡人宗慶所殺便崩其孫嗣立卽開佛法天下大明第六
帝孝文是稱文祖改姓爲元改代爲魏去胡服定官名衣冠華夏移
都河洛佛法大興然世祖勇於武略怯於文雅輕於自審重於信僞
而突敘爲命世之明后寔誣也哉尋奕搜檢列代上事言及釋門者
大略五焉前已顯之今重昌辨一以業運冥昧報果交加二以教指
俗僞終歸空滅三以寺宇崇麗顧陵嫉之四以僧有雜行抄掠財色
五以僧本緣俗位隆抗禮五相雖惑多以雜行者爲言焉斯不達之
曲士也夫出家者取其發足超方形心異俗執持聖種震懾魔王天
帝尙來下拜龍神無不奉者非無五三雜行犯法負心婆娑於色味

貪饕於名利斯等行乖佛化正法稊稂涅槃謂爲禿人梵網呼爲大賊戒海如屍不納僧條財法絕之斯禁顯然妄咎於佛深不可也至如俗士純臣有國常有行貞潔者重之爲貪競者罪之可以見一士乖僻合國並誅一官濁濫舉朝同翦斯不可也事見後魏書及十六國春秋世祖見一寺過起通國斬僧無問少長一時殘戮可謂虜官長也判事雷同奕引以爲明略明者逃矣又以見僧受供厚禮頻繁自不能拔妬而增狀僧爲福田奉之自獲其報官是攝政祿之以盛其功今王賜臣下讓祿者是誰俗施僧財不受者常有無祿之官不聞於國受俸之士克牾九州豈以一士受賕朝廷爲之廢務一僧濫施釋門由此致嫌又不可也是知清濁異途道俗通有憲臺繩紃於失法詳刑科處於重輕斯俗政也戒律以檢於七非擯罰以正於三格僧制以遮其外犯法令以勗其內心此佛教也是則道俗律令具足光明昭彰於四俗顯昌於五衆有何不盡須爾上言所以上帝高

居於九重殷鑒四海列辟靡盬於王事職司其憂爾非其司妄行干政徒爲濫職何用當官故後之上事希有從之者故經說四依擬分僞濫人識難辦法智易明何得見一僧行過上累佛宗見一戒或虧便輕正法止可以道廢人以人不弘道也不可以人廢道以道高出天人抑又詳之今以五常檢人何人能具五孝檢士何士備之讀易而忽陰陽講禮而存倨傲闇君賊臣代代常有尸祿亂政時時更繁孔門三千顏生獨爲德行君人二十九代唐堯常據其首初略述統詳則釋門藻鏡者殷矣

二周祖武皇帝志存道學躬受符籙猜忌佛門帝姓宇文氏諱邕太祖魏丞相黑泰之第三子也族本鮮卑元魏之末太祖挾魏平陽王西頓關中經魏四帝二十三年薨世子洛陽公受魏禪稱周當年被廢立弟寧都公爲帝四年崩諡明帝兒小立弟魯國公爲帝卽高祖也改號保定元年深謀獨斷猜忌爲心晦迹親疎以蒙智術保定六

年改元天和前後經于一紀大冢宰晉國公宇文護太祖之猶子也躬受遺詔輔翼帝圖雄略攝御光時佐國恐有廢立便引入內殺之并子十人族大臣六家改元建德誅除雄武摧翦扞城慮遠權衡英威自若而能克己勵精露懷臣下布袍菲食勞謙自持躬履行陣步涉山谷故得士卒之心死而不厭時有識記忌於黑衣謂沙門中次當襲運故帝初大信佛以事逼身遂行廢蕩以建德三年納道士張賓佞辯便滅二教更立通道觀用暢本懷至建德五年平齊旣訖自以爲滅法之福祐也改元宣政至五月因癘而崩於雲陽子贊嗣位殺齊王父子十人正月一日改元大成禪位其子衍改元大象自號天元皇帝便開佛法然則禍深福淺過掩其功明年五月崩諡曰文宣後年正月改元大定二月內禪位有隋故奕述云觀武帝爲政果決能斷此其志也旣除妖邪之教唯務強兵五年之間大勦斯集盛矣其有成功也集者曰奕云無佛則國安祚遠如何周祖誅除纔了

凶崩忽臨則突爲狂矣然則武帝雄武曾不遲疑隨心快意便行誅戮害叔毀佛欺罔已深祚促曆移固其宜矣況復癘及其身呼嗟何及殃鍾禍集又可悲涼乃以指正佛爲妖邪指僞道爲師奉闇君荒主豈待夏殷固諡法之司魏周滅法之主俱爲武者不亦宜乎餘有除毀相狀感於苦報如別具述

宋世祖孝武皇帝沙汰僧徒并致政事帝姓劉氏諱駿文帝之第三子也爲父討逆斬兄邵於南郊并子三十一人自立改元孝建二年誅叔義宣大明二年誅王僧達父子有羌人高閹反事及沙門曇標下詔曰佛法訛替沙門混雜未足扶濟鴻教而專成逋蕘加以姦心頻發凶狀屢聞敗道亂俗人神交忿可付所在精加沙汰後有違犯嚴其誅坐遂設諸條禁自非戒行精苦並使還俗詔雖嚴重竟不施行先是晉成帝時庾冰專政欲令沙門致敬王者何充王謐等駁議不同及桓玄篡位復述前議俱不果行備如別述世祖以大明六年

使有司奏議令僧致敬既行剗斲之虐鞭顏皴面而斬之人不勝其酷也且僧拜非經國之典亦不行之大明八年崩子業立尋爲明帝所奪而傅奕敘爲高識之帝濫刑何識之可高耶倏忽絕嗣身名俱滅可爲殷鑒矣按蕭子顯述曰宋氏自稱水德承運典午正位八君十年五紀四經絕嫡三號中興間關禍難相陵骨肉何可言哉

大唐高祖太武皇帝沙汰釋李二宗詔帝以武德末年僧徒多僻下詔澄簡肅清遺法非謂除滅尤爲失旨故詔云朕膺期馭宇興隆教法深思利益情在護持使玉石區分薰蕕有辨長存妙道永固福田正本澄源宜從沙汰斯正詔也而奕敘爲滅法則誣君罪囚值容養寬政網漏吞舟故存其首領耳餘如後述奕又引元魏尙書令任城王澄奏議不許邑里更造伽藍妨人居住又引尙書令高肇奏僧祇戶粟散給貧人閱其表奏無除毀狀但在匡政理教除其僻險斯之詳糾弘護之規諫矣

後趙中書太原王度奏議序石虎下書問曰佛號世尊國家所奉閭里小人無爵秩者爲應得事佛不又沙門皆應高潔貞正行能精潔然後可爲道士今沙門甚衆或有姦宄避役多非其人可料簡詳議度奏以王者郊祀天地祭奉百神故禮有恆饗佛生西域非中華所奉漢氏初得其道唯聽西域人立寺都邑魏承漢制趙由舊章請趙人不聽詣寺已爲沙門者遣還初服朝士多同此議虎下詔曰度議佛是外神非諸華所奉朕出邊戎宜從本俗夫制由上行永世作則苟允事無虧何拘前代其夷趙爲道士樂事佛者悉聽餘有奕爲潤飾多陳妖詐道家之書僞妄自昔黃書合氣士女淫行赤章厭禱幽明亂起是知妄作者凶亂俗者殺罪有餘矣何者奕云佛圖澄令弟子遊說郡國支遁之徒爲其股肱翻三玄妙旨文飾邪教斯言訛謗天地不容何者佛圖澄者得聖之人也乳孔流光不假燈炬之照占鈴映掌坐觀成敗之儀兩主奉之若神百辟敬之如佛預啓東儲之

貳前表石葱之禍及難生妖現諫虎以刑濫法深饗壽不遙斯言甚切而奕乃云令虎殺姪取其帝位何斯言之過歟又云支遁之徒爲其羽翼晉氏南度止一道林雖是同時江山胡越安得散身奔北股肱趙朝又云翻三玄妙旨文飾邪教此亦虛言何得妄旨且道之述作止在五干自餘千卷都是虛詐備詳魏日姜斌事乎然則自忖者審謂僧亦然且佛之教義綸綜有歸前後文理無相乖競尋繹道經濫竊何甚不能自立一義並傍佛宗或四果十地連寫內經或地獄天堂全書佛旨斯並業行之昇沉報因之盛則也問以位行階級則事逾河漢如何敘集圖傳迷俗亂真無纖毫以助化有山嶽之負犯枉沒卒歲又可悲夫

蔡謨字道明陳留人晉太常彭城王紘表以肅祖好佛道手畫形像於樂賢堂經歷寇難而堂猶存宜勅著作咸使作頌顯宗出紘表博議謨曰佛者夷人唯聞變夷從夏不聞變夏從夷先帝天縱多才聊

畫此像未是大晉盛德之形容今欲發王命勅史官上稱先帝好佛之志下爲夷狄作一像之頌於義有疑焉康帝卽位拜司徒永和四年五月詔書下固執不就上疏乞骸骨及孝宗臨軒徵謨不至自旦至中皇太后詔罷朝公卿奏送謨廷尉以正刑書謨率子弟素服詣廷尉待罪詔免爲庶人便杜門不出斯並剛愎之鄙夫井坎之固量也而奕敘爲純臣未爲篤論何者謨之諷議局據神州一域以此爲中國也佛則通據閭浮一洲以此爲邊地也卽目而敘斯國東據海岸三方則無無則不可謂無邊可見也此洲而談四周環海天竺地之中心夏至北行方中無影則天地之正國也故佛生焉況復隄封所及三千日月萬億天地之中央也唯佛所統非謨能曉且庸庶生常保局冰執自古同謂家自爲我土樂人自以爲我民良不足怪也中原嵩洛土圭測景以爲中也乃是神州之別中耳至時分不能定之江表島夷地卑氣厲情志飛揚故曰揚州晉氏奔之長稱文國